

11/02/2002

Sarawak tidak campur tangan rundingan UBG, RHB Bank

KERAJAAN Sarawak tidak akan campur tangan dalam urusan rundingan penggabungan Utama Banking Group (UBG) melalui anak syarikatnya Bank Utama (M) Bhd (Bank Utama) dengan RHB Bank yang kini dilaporkan berjalan lancar.

Jaminan itu diberikan oleh Menteri Kewangan dan Kemudahan Awam negeri Sarawak, Tan Sri Dr George Chan Hong Nam, sambil menyifatkan proses itu sebagai rundingan persendirian.

Bagaimanapun beliau yang juga Timbalan Ketua Menteri berkata kerajaan negeri Sarawak masih tetap menaruh harapan besar Bank Utama akan diberi status bank teras oleh kerajaan Pusat.

"Rundingan ini (penggabungan dengan RHB Bank) adalah persendirian yang mana ahli politik tidak patut campur tangan. Dalam hal ini, kita juga berpendapat tidak sewajarnya memberi komen.

"Bagaimanapun seperti dinyatakan berulang kali sebelum ini, Sarawak perlu memiliki sebuah bank teras dan kita harap proses rundingan yang sedang berjalan ini akan berjaya," katanya di Miri, semalam.

Beliau berkata demikian ketika diminta mengulas kemungkinan kerajaan negeri Sarawak akan campur tangan bagi membantu menyelesaikan proses penggabungan Bank Utama dengan RHB Bank sekali gus menjadikan bank itu sebagai bank teras.

Bank Utama yang berpangkalan di Sarawak adalah satu-satunya bank yang belum bergabung dengan mana-mana bank teras tetapi rundingan dikatakan masih diteruskan dalam usahanya menguasai RHB Bank, satu daripada 10 bank teras.

Datuk Seri Dr Mahathir Mohamad yang juga Menteri Kewangan baru-baru ini menyatakan bahawa pihaknya menetapkan cuma 10 bank teras dan jumlahnya juga akan terus dikurangkan melalui penggabungan pada masa akan datang.

Perdana Menteri juga memberi tempoh enam bulan sehingga Jun ini kepada UBG untuk mencari rakan gabungan dan jika gagal, kerajaan tidak akan teragak-agak untuk menarik balik lesen perbankan Bank Utama.

Kenyataan beliau diperkukuhkan lagi timbalannya, Datuk Seri Abdullah Ahmad Badawi, yang menyatakan kerajaan tidak akan berganjak daripada keputusannya untuk hanya membenarkan 10 bank teras beroperasi di negara ini.

Tegas beliau, kerajaan tidak akan melonggarkan dasar penggabungan bank atau menambah bilangan bank teras sedia ada kepada 11 seperti yang mungkin diharapkan oleh mana-mana pihak.

(END)